

石林詞一卷

葉夢得

題石林詞

右承葉公。以經術文章。爲世宗儒。翰墨之餘。作爲歌調。亦妙天下。元符中。予兄聖功爲鎮江掾。公爲丹徒尉。得其小詞爲多。是時妙齡氣豪。未能忘懷也。味其詞。婉麗綽有溫李之風。晚歲落其華而實之。能於簡淡時出雄傑。合處不減靖節東坡之妙。豈近世樂府之流哉。陳德昭始得之。喜甚。出以示余。揮汗而書。不知暑氣之去也。詩云。誰能執熱。逝不以濯。公詞之能慰人心蓋如此。紹興十七年七月九日。東廡關注書。

石林詞

目錄

賀新郎一調	水調歌頭七調	八聲甘州四調
念奴嬌三調	滿庭芳三調	滿江紅二調
應天長一調	定風波四調	江城子五調
竹馬兒一調	浣溪沙八調	永遇樂二調
臨江仙十九調	虞美人八調	減字木蘭花三調
木蘭花一調	點絳脣三調	鷓鴣天七調
水龍吟二調	千秋歲二調	驀山溪一調
清平樂一調	雨中花一調	南鄉子三調
卜算子二調	菩薩蠻一調	蝶戀花一調
醉蓬萊一調	南歌子一調	採桑子一調

石林詞目錄終

宋六十名家詞

石林詞

宋 葉夢得

賀新郎（或刻李玉）

睡起流鶯語。掩蒼苔房櫺向晚。亂紅無數。吹盡殘花無人見。惟有垂楊自舞。漸暝靄初回輕暑。寶扇重尋明月影。暗塵侵上有乘鸞女。驚舊恨。遽如許。江南夢斷橫江渚。浪黏天。葡萄漲綠。半空煙雨。無限樓前滄波意。誰採蘋花寄取。但悵望蘭舟容與。萬里雲颿何時到。送孤鴻目斷千山阻。誰爲我。唱金縷。

水調歌頭（潯州觀魚臺作）

渺渺楚天濶。秋水去無窮。兩崖不辨牛馬。輕浪舞回風。獨倚高樓一笑。圍圍遊魚來往。還戲此波中。危檻對千里。落日照晴空。子非我。安知我。意真同。鵬飛鵬化何有。滄海漫冲融。堪笑磻溪遺老。白首直鉤溪畔。歲晚忽衰翁。功業竟安在。徒自兆非熊。

又（九月望日與客習射西園余病不能射）

霜降碧天靜。秋事促西風。寒聲隱地初聽。中夜入梧桐。起瞰高城回望。寥落關河千里。一醉與君同。疊鼓鬧清曉。飛騎引雕弓。歲將晚。客爭笑。問衰翁。平生豪氣安在。走馬爲誰雄。何似當筵虎士。揮手絃聲響處。雙雁落遙空。老矣真堪愧。回首望雲中。

又(送八舅朝請)

江海渺千里。飄蕩歎流年。等閒足馬相過。乘興卻翛然。十載悲歡如夢。撫掌驚呼相語。往事盡飛煙。此會真難偶。此醉且留連。酒方半。誰輕便。動離絃。我歌未闕公去。明日復山川。空有高城危檻。縹緲當筵清唱。餘響落尊前。細雨黃花後。飛雁落遙天。

又(湖光亭落成)

修眉掃遙碧。清鏡走回流。隄外柳煙深淺。碧瓦起朱樓。分付平雲千里。包卷騷人遺思。春色入簾鉤。桃李盡無語。波影動蘭舟。念謝公平生志。在滄洲。登臨漫懷風景。佳處每難酬。卻歎從來賢士。如我與公多矣。名迹竟誰留。惟有尊前醉。何必問消憂。

又(次韻叔父寺丞林德祖和休官詠懷)

今古幾流轉。身世兩萍忙。那知一丘一壑。何處不堪藏。須信超然物外。容易扁舟相踵。分占水雲鄉。雅志真無負。來日故應長。問騏驎。空矯首。爲誰昂。冥鴻天際塵事。分付一輕芒。認取騷人生此。但有輕篷短楫。多製菱荷裳。一笑陶彭澤。千載賀知章。

又(癸丑中秋)

河漢只平野。香霧捲西風。倚空千幃橫起。銀闕正當中。常恨年年此夜。醉倒歌呼誰和。何事與君同。莫恨歲華晚。容易感梧桐。攬清影。君試與。問天公。遙知玉斧初斲。重到廣寒宮。付與孤

光千里。不遣微雲點綴。爲我洗長空。老去狂猶在。應未笑衰翁。

又

秋色漸將晚。霜信報黃花。小窗低戶深映。微路繞欹斜。爲問山公何事。坐看流年輕度。拚卻鬢雙華。徙倚望滄海。天淨水明霞。念平昔。空飄蕩。徧天涯。歸來三徑重掃。松竹本吾家。卻恨悲風時起。冉冉雲間新雁。邊馬怨胡笳。誰似東山老。談笑淨胡沙。

八聲甘州（壽陽樓八公山作）

故都迷岸草。望長淮。依然繞孤城。想烏衣年少。芝蘭秀發。戈戟雲橫。坐看驕兵南渡。沸浪駭奔鯨。轉眄東流水。一顧功成。千載八公山下。尙斷崖草木。遙擁崢嶸。漫雲濤吞吐。無處問豪英。信勞生。空成今古。笑我來何事。愴遺情。東山老。可堪歲晚。獨聽桓箏。

又（正月二日作是歲閏正月十四日纔立春）

又新正過了。問東風。消息幾時來。笑春工多思。留連底事。猶未輕回。應爲瑤刀裁翦。容易惜花開。試向湖邊望。幾處寒梅。好是綠莎新徑。剩安排芳意。特地重栽。便從今追賞。莫遣暫停盃。有千株。深紅淺白。倩緩歌急管。特相催。憑看取。暖煙細靄。先到高臺。

又

問浮家泛宅。自玄真去後。有誰來。漫煙波千頃。雲峯倒影。空翠成堆。可是溪山無主。佳處且徘徊。

徊暮雨捲晴野。落照天開。老去餘生江海。伴遠公香火。猶有宗雷。便何妨元亮。攜酒間相陪。寄清談芒屨。筇杖更盡驅風月。入尊疊江村路。我歌君和。莫棹船回。

又（甲辰承詔。知止亭初畢工。劉無言相過。）

寄知還倦鳥。對飛雲無心兩難齊。漫飄然欲去。悠然且止。依舊山西。十畝荒園未徧。趁雨卻鋤犁。敢忘鄰翁約。有酒同攜。況是巖前新建。帶小軒橫絕。松桂成蹊。試憑高東望。雲海與天低。送滄波浮空千里。照斷霞明滅。卷晴霓。君休笑。此生心事。老更沈迷。

念奴嬌（南歸渡楊子作雜用淵明語）

故山漸近。念淵明歸意。翛然誰論。歸去來兮秋已老。松菊三徑猶存。稚子歡迎。飄飄風袂。依約舊衡門。琴書蕭散。更欣有酒盈尊。惆悵萍梗無根。天涯行已徧。空負田園去矣。何之。窗戶小。容膝聊倚南軒。倦鳥知還。晚雲遙映。山氣欲黃昏。此還真意。故應欲辨忘言。

又（中秋燕客。有懷壬午歲吳江長橋。）

洞庭波冷。望冰輪初轉。滄海沈沈。萬頃孤光雲陣卷。長笛吹破層陰。洶湧三江。銀濤無際。遙帶五湖深。酒闌歌罷。至今鼉怒龍吟。回首江海平生。漂流容易散。佳會難尋。縹緲高城風露爽。獨倚危闌重臨。醉倒清尊。姮娥應笑。猶有向來心。廣寒宮殿。爲予聊借瓊林。（或刻百字令字句迥異）

又

雲峯橫起。障吳關三面。真成尤物。倒卷回潮目。盡處秋水黏天無壁。綠鬢人歸。如今雖在。空有千莖雪。追尋如夢。謾餘詩句猶傑。聞道尊酒登臨。孫郎終古恨。長歌時發。萬里雲屯。瓜步晚落日旌旗明滅。鼓吹風高。畫船遙想。一笑吞窮髮。當時曾照。更誰重問山月。

滿庭芳（雨後極目亭寄示張敏仲程致道）

麥隴如雲。清風吹破。夜來疏雨纔晴。滿川煙草。殘照落微明。縹緲危闌曲檻。遙天盡日脚初平。青林外。參差暝靄。縈帶遠山橫。孤城春雨過。綠陰是處。時有鶯聲。問落絮遊絲。畢竟何成。信步蒼苔繞徧。真堪付閒客閒行。微吟罷。重回皓首。江海渺送情。

又（張敏叔程致道和示復用韻寄酬）

楓落吳江。扁舟搖蕩。暮山斜照催晴。此心長在。秋水共澄明。底事經年易拚。驚遺恨悄悄難平。臨風處。佳人萬里。霜笛與誰橫。長城誰敢犯。知君五字。元有詩聲。笑茅舍何時。歸此真成。絲鬢朱顏老盡。柴居在行。卽終行。聊相待。狂唱醉舞。雖老未忘情。

又（次韻答蔡州王道濟大夫見寄）

一曲離歌。煙林人去。馬頭微雪新晴。隔年光景。回首近清明。斷送殘花又老。春波靜。湖水初平。誰重到。雕闌盡日。遙想畫橋橫。高城凝望久。何人爲我。重唱餘聲。問桃李更有幾處陰成。老

去從遊似夢。尊前事空有。經行猶能記。慇懃寄語。多謝故人情。

滿江紅（重陽賞菊時余已除代）

一朵黃花。先催報秋歸消息。滿芳枝凝露。爲誰裝飾。便向尊前拚醉倒。古今同是東籬側。問何須特地賦歸來。拋彭澤。回首去年時節。開口笑。真難得。使君今那更。自成行客。霜鬢不辭重插滿。他年此會何人憶。記多情曾伴小闌干。親攀摘。

又

雪後郊原。煙林外梅花初拆。春欲半。猶自探春消息。一眼平蕪看不盡。夜來小雨催新碧。笑去年攜酒折花人。花應識。蘭舟漾城南陌。雲影淡。天容窄。繞風漪十頃。暝浮晴色。恰是槎頭收釣處。坐中仍有江南客。問如何兩漿下苕溪。吞雲澤。

應天長（自穎上縣欲還具作）

松陵秋已老。正柳岸田家。酒醅初熟。鱸膾蓴羹。萬里水天相續。扁舟波浩渺。寄一葉、荳蔻浮沃。青簫笠。西塞山前。自翻新曲。來往未應足。便細雨斜風。有誰拘束。陶寫中年。何待更須絲竹。鷗夷千古意。算入手、比來尤速。最好是、千點雲峯。半篙澄綠。

定風波（與幹譽才卿步西園始見青梅）

破萼初驚一點紅。又看青子映簾櫳。冰雪肌膚誰復見。清淺。尙餘疏影照晴空。惆悵年年桃

李伴。腸斷。祇應芳信負東風。待得微黃春亦暮。煙雨半和飛絮作濛濛。

又

渺渺空波下夕陽。睡痕初破水風涼。過雨歸雲留不住。何處。遠村煙樹半微茫。莫笑經年人老矣。歸計得遲留處也何妨。老子興來殊不淺。簾捲。更邀明月坐胡牀。

又

千步長虹跨碧流。兩山浮影轉螭頭。付與詩人都總領。風景。更逢仙客下瀛洲。嫋嫋涼風吹汗漫。平岸遙空新卷絳河收。卻怪姮娥真好事。須記。探支明月作中秋。

又

斜漢初看素月流。坐驚金餅出雲頭。華髮蕭然吹素領。光景。何妨分付屬滄洲。莫待霜花飄爛熳。蘋岸更憑佳句盡拘收。解與破除消萬事。猶記。一尊同得二年秋。(此魯卿見和復答之)

江城子 (原刻六闋。收銀瀾無際卷蓬瀛。是東坡詞。刪去。)

碧潭浮影蘸紅旗。日初遲。漾晴漪。我欲尋芳。先遣報春知。盡放百花連夜發。休更待。曉風吹。滿攜尊酒弄繁枝。與佳期。伴羣嬉。猶有邦人。爭唱醉翁詞。應笑今年狂太守。能痛飲。似當時。

又 (大雪與客登極目亭)

蹀躞飛舞半空來。曉風催。巧縈迴。野曠天遙。回望興悠哉。欲問玉京知遠近。試攜手。上高臺。

雲濤無際卷崔嵬。斂浮埃。照瓊瑰。點綴林花，真個是多才。說與化工留妙手，休盡放，一時開。

又（再送盧倅）

芙蓉開過雨初晴。曲池平。畫橋橫。耿耿星河，遙下蘸空明。一舸吳松歸未得，聊共住，小蓬瀛。問君何事引前旌。趣歸程。背高城。魚鳥三年，誰道總無情。試遣他年歌此曲，應尙記，別時聲。

又（登小吳臺小飲）

生涯何有但青山。小溪灣。轉潺湲。投老歸來，終寄此山間。茅舍半欹風雨橫，荒徑晚，亂榛菅。強扶衰病上巉巔。水雲間。伴躋攀。湖海蒼茫，千里在吳關。漫有一杯聊自醉，休更問，鬢毛斑。

又（次韻葛魯卿上元）

甘泉祠殿漢離宮。五雲中。渺難窮。永漏通宵，壺矢轉金銅。曾從鈞天知帝所，孤鶴老，寄遼東。強扶衰病步龍鍾。雪花濛。打窗風。一點青燈，惆悵伴南宮。唯有使君同此恨，丹鳳口，水雲重。

竹馬兒

與君記平山堂前細柳，幾回同挽。又征帆夜落，危檻依舊，遙臨雲巘。自笑來往匆匆，朱顏漸改，故人俱遠。橫笛想遺聲，但寒松千丈，傾崖蒼蘚。世事終何已，田陰縱在，歲陰仍晚。嵇康老來尤懶，只要蓴羹菰飯，卻欲便買茅廬，短篷輕櫂，尊酒猶能辦。君能過我，水雲聊爲伴。

浣溪沙（重陽一日極目亭）

小雨初回昨夜涼。繞籬新菊已催黃。碧空無際卷蒼茫。
千里斷鴻供遠目。十年芳草掛愁腸。
緩歌聊與送瑤觴。

又

睡粉輕消露臉新。醉紅初破玉肌勻。尊前留得兩州春。
剩挽雕盤欹醉帽。重催飛騎走紅塵。
十年蘭蕙笑騷人。

又（送盧倅）

荷葉荷花水底天。玉壺冰酒釀新泉。一歡聊復記他年。
我亦故山歸去客。與君分手暫流連。
佳人休唱好因緣。

又（意在亭）

休笑山翁不住山。二年偷向此中間。歸來贏得鬢毛斑。
甕底新醅供酩酊。城頭曲檻俯淙潺。
山翁元在此山間。

又（許公堂席上次韻王幼安）

絳蠟燒殘夜未分。寶箏聲暝拍初勻。斗樞光照坐生春。
便恐賜還歸袞繡。莫辭揮翰落煙雲。
鳳城西去斷離魂。

又（用前韻再答幼安）

綠野歌歡喜見分。驟驚和氣曉來勻。妙歌誰敢和陽春。
梅蕊舊年迎臘雪。月華今夜破寒雲。
獨醒爭笑楚人魂。

又（次韻王幼安曹存之園亭席上）

物外光陰不屬春。斷留風景伴佳辰。醉歸誰管斷腸人。
柳絮尙飄庭下雪。梨花空作夢中雲。
竹間籬落水邊門。

又（與魯卿酌別席上次韻）

千古風流詠白蘋。二年歌笑擁朱輪。翩翩卻憶上林春。
劍履便應陪北闕。袴襦那更假西人。
玉堂金殿要詞臣。

永遇樂（寄懷張敏叔程致道）

蘋芷芳洲。故人回首。雲海何處。五畝荒田。慙勤問我。歸此真成否。洞庭波冷。秋風嫋嫋。木葉亂
隨風舞。記扁舟橫斜。載月目極。暮濤煙渚。傳聲試問。垂虹千頃。蘭棹有誰重駐。雪濺雷翻。潮
頭過後。颿影欹前浦。此中高興。何人解道。天也未應輕付。且略取。千鍾痛飲。與君共賦。

又（蔡州移守穎昌與客會別臨芳觀席上。或刻蘇子瞻）

天末山橫。半空簫鼓。樓觀高起。指點裁成。東風滿院。總是新桃李。綸巾羽扇。一尊飲罷。目送斷
鴻千里。攬清歌餘音不斷。縹渺尙縈流水。年來自笑無情。何事猶有多情遺思。綠鬢朱顏。匆

匆拚了。卻記花前醉。明年春到。重尋幽夢。應在亂鶯聲裏。拍闌干。斜陽轉處。有誰共倚。

臨江仙

聞道今年春信早。梅花不怕餘寒。憑君先近向南看。香苞開徧未。莫待北枝殘。腸斷隴頭他日恨。江南幾驛征鞍。一盃聊與盡餘歡。風情何似我。老去未應闌。

又（雪後寄周十）

夢裏江南渾不記。祇今幽戶難忘。夜來急雪繞東堂。竹窗松徑裏。何處問歸艎。瓮底新醅應已熟。一尊知與誰嘗。會須雄筆卷蒼茫。雲濤聲隱戶。瓊玉照頽牆。

又（與客湖上飲歸）

不見跳魚翻曲港。湖邊特地經過。蕭蕭疏雨亂風荷。微雲吹盡散。明月墮平波。白酒一盃還徑醉。歸來散髮婆娑。無人能唱採菱歌。小軒欹枕簟。檐影挂星河。

又（送章長卿還姑蘇兼寄程致道）

碧瓦新霜侵曉夢。黃花已過清秋。風颿何處挂扁舟。故人歸欲盡。斜日更回頭。樂圃橋邊煩借問。有人高臥江樓。寄聲聊爲訴離憂。桂叢應已老。何事久淹留。

又（席上次韻韓文若）

聞道安車來過我。百花未敢飄零。疾催絃管送盃行。五朝瞻舊老。揮麈聽風生。鳳詔遠從天。

上落高堂燕喜初醒。莫言白髮減風情。此時誰得似。飲罷卻精神。

又（晁以道見和答韓文若之句復答之二首）

三月鶯花都過了。曉來雪片猶零。嵩陽居士記行行。西湖初水滿。遙想縠紋生。欲爲海棠傳信息。如今底事長醒。不應高臥頓忘情。留春春不住。老眼若爲明。

又

唱徹陽關分別袂。佳人粉淚空零。請君重作醉歌行。一歡須痛飲。回首念平生。卻怪老來風味減。半酣易逐愁醒。因花那更賦閒情。鬢毛今爾耳。空笑老淵明。

又（次韻洪思成湖上）

潑灑湖光供一笑。未須醉日論千。將軍曾記舊臨邊。野塘新水漫。煙岸酒如船。卻怪情多春又老。回腸易逐愁煎。何如旌旆鬱相連。凱歌歸玉帳。錦帽碧油前。

又（同王幼安洪思成過曾存之園亭）

學士園林人不到。傳聲欲問江梅。曲闌清淺小池臺。已知春意近。爲我著詩催。急管行觴園舞袖。故人坐上三台。（幼安與存之少相從）此歡此宴固難陪。不辭同二老。倒載習池回。

又（次韻答幼安思成存之席上梅花）

不與羣芳爭豔豔。化工自許寒梅。一枝臨晚照歌臺。眼明渾未見。絃管莫驚催。記取劉郎歸

去路。千年應話天台。酒闌不惜更重陪。夜寒衣袂薄。猶有暗香回。

又（晚之湖上）

三日疾風吹浩蕩。綠蕪未徧平沙。約回殘影射明霞。水光遙泛坐。煙柳互欹斜。霜鬢不堪春點檢。留連又見芳華。一枝重插去年花。此身江海夢。何處定吾家。

又（熙春臺與王取道寶方同會公袞會別）

自笑天涯無定準。飄然到處遲留。興闌卻上五湖舟。鱸葦新有味。碧樹已驚秋。臺上微涼初過雨。一尊聊記同遊。寄聲時爲到滄洲。遙知欹枕處。萬壑看交流。

又（次葛魯卿法華山曲水勸酒）

山半飛泉鳴玉珮。回波倒卷粼粼。解巾聊濯十年塵。青山應卻怪。此段久無人。行樂應須賀太守。風光過眼逡巡。不辭常作坐中賓。只愁花解笑。衰鬢不宜春。

又（西園石春亭新成）

手種千株桃李樹。參差半已成陰。主人何事馬駸駸。二年江海路。空負種花心。試向中間安小檻。此還長要追尋。卻驚搖落動悲吟。春歸知早晚。爲我變層林。

又（南山絕頂作壑新成與客賞月）

絕頂參差千嶂外。不知空水相浮。下臨湖海見三州。落霞橫暮景。爲客小遲留。卷盡微雲天

更濶。此行不負清秋。忽驚河漢近人流。青霄元有路。一笑倚瓊樓。

又（明日與客復登臺再用前韻）

一醉三年那易得。應須大白同浮。已知絕景是吾州。嫦娥仍有意。更肯爲人留。萬籟無聲遙夜永。人間未識高秋。從來我客盡風流。故知憐老子。尤勝在南樓。

又（明日小雨已而風大作復晚晴遂見月與客再登）

卷地驚風吹雨過。卻堪香霧輕浮。遙知清影徧南州。萬峯橫玉立。誰爲此山留。邂逅一歡須共惜。年年長記今秋。平生江海恨飄流。元龍真老矣。無意臥高樓。

又（詔芳亭贈坐客）

一醉年年今夜月。酒船聊更同浮。恨無羯鼓打梁州。遺聲猶好在。風景一時留。老去狂歌君勿笑。已拚雙鬢成秋。會須擊節泝中流。一聲雲外笛。驚看水明樓。（世傳梁州西梁府初進此曲。會明皇遊月宮還。記霓裳之曲。適相近。因作霓裳羽衣曲。以梁州名之。是夕約諸君明夜泛舟。故有梁州中流之句。）

又

草草一年真過夢。此生不恨萍浮。且令從事到青州。已能從辟穀。那更話封留。好月尙尋當日約。故人何啻三秋。援琴欲寫竹間流。此聲誰解聽。吟上仲宣樓。

虞美人（雨後同幹譽才卿置酒來禽花下作。○或刻蘇子瞻或刻周美成。）

落花已作風前舞。又送黃昏雨。曉來庭院半殘紅。惟有游絲千丈。罥晴空。慙慙花下同攜手。更盡盃中酒。美人不用歛蛾眉。我亦多情無奈。酒闌時。

又（極目亭望西山）

翻翻翠葉梧桐老。雨後涼生早。葛巾藜杖正關情。莫遣繁蟬容易。作秋聲。遙空不盡青天去。一抹殘霞暮。病餘無力厭躋攀。爲寄曲闌幽意。到西山。

又（上巳席上）

一聲鶗鴂催春晚。芳草連空遠。年年餘恨怨殘紅。可是無情容易。愛隨風。茂林脩竹山陰道。千載誰重到。半湖流水夕陽前。猶有一觴一詠。似當年。

又（同蔡寬夫置酒王仲弓出歌人聲甚妙）

東風一夜催春到。楊柳朝來好。莫辭尊酒重攜持。老去情懷能有幾人知。鳳臺園裏新詩伴。不用相追喚。一聲清唱落瓊卮。千頃西風。煙浪晚雲遲。

又

數聲微雨風驚曉。燭影欹殘照。客愁不奈五更寒。明日梨花開盡。有誰看。追尋猶記清明近。爲向花前問。東風正使解欺儂。不道花應有恨也。匆匆。

又（寒食泛舟）

平波漲綠春隄滿。渡口人歸晚。短篷輕楫費追尋。始信十年歸夢是如今。故人回望高陽里。遙想車連騎。尊前點檢舊年春。應有海棠猶記插花人。

又

(通堂睡起同吹洞簫)

綠陰初過黃梅雨。隔葉聞鶯語。睡餘誰遣夕陽斜。時有微涼風動入窗紗。天涯走遍終何有。白髮空搔首。未須錦瑟怨年華。爲寄一聲長笛怨梅花。

又(贈蔡子因)

梅花落盡桃花小。春事餘多少。新亭風景尚依然。白髮故人相遇且留連。家山應在層林外。悵望花前醉。半天煙霧尚連空。笑取扁舟歸去與君同。

減字木蘭花

黃花暫老。秋色欲歸還。艸艸花下前期。花老空歌鵲踏枝。狂醒易醒。不似舊時長酩酊。玉簫新涼數盡更籌夜。更長。

又(雪中賞牡丹)

前村夜半。每爲江梅腸欲斷。淺紫深紅。誰信漫天雪裏逢。醉頭扶起。宿酒闌干猶困倚。便莫催殘。明日東風爲掃看。

又(王幼安見和前韻復用韻答之)

粉消妝半。一曲陽春歌始斷。便覺香紅十倍光華。簪未逢。楊花吹起。猶自風前相枕倚。莫恨春殘。留取新詩仔細看。

木蘭花（三月二十六日晚雨集客湖上）

花殘卻似春留戀。幾日餘香吹酒面。濕煙不隔柳條青。小雨池塘初有燕。波光縱使明如練。可奈落紅粉似霰。解將心事訴東風。只有啼鶯千種囀。

點絳脣

（晚出山榭。春初植蘭榭側。近復生紫芝十一本。）

高柳蕭蕭。睡餘已覺西風勁。小窗人靜。淅瀝生秋聽。底事多情。欲與流年競。殘雲暝。墜巾慵整。獨立芝蘭徑。

又（紹興乙卯登絕頂水亭）

縹緲危亭。笑談獨在千峯上。與誰同賞。萬里橫煙浪。老去情懷。猶作天涯想。空惆悵。少年豪放。莫學衰翁樣。

又（丙辰八月二十七日雨中與何彥亨小飲）

山上飛泉。漫流水下知何處。亂雲無數。留得幽人住。深閉柴門。聽盡空簷雨。秋還暮。小窗低戶。唯有寒蛩語。

鷓鴣天（與幹譽賞梅）

不怕微霜點玉肌。恨無流水照冰姿。與君著意從頭看。初見今年第一枝。
人醉後。雪消時。江南春色寄來遲。使君盡是花前客。莫怪慙勤爲賦詩。

又（元夕次韻幹譽）

夾路行歌盡落梅。篆煙香細裊寒灰。雲移碧海三山近。月破中天九陌開。
追樂事。惜多才。車聲遙聽走隨雷。十年夢斷鈞天奏。猶記流霞醉後盃。

又（雨後湖上看落花）

小雨初收報夕陽。歸雲欲渡轉橫塘。空回雨蓋翻新影。不見瓊肌洗暗香。
追落景。弄微涼。尙餘殘淚浥空牀。祇應自有東風恨。長遣啼痕破晚妝。

又（續探蓮曲）

曉日初開露未晞。夕陽輕散雨還微。暗搖綿霧游條戲。斜映紅雲屬玉飛。
情脈脈。恨依依。沙邊空見棹船歸。何人解舞新聲曲。一試纖腰六尺圍。

又（次韻魯卿大錢觀太湖）

蘭芷空悲楚客秋。旌旗誰見使君遊。凌雲不隔三山路。破浪聊憑萬里舟。
公欲去。尙能留。盃行到手未宜休。新詩無物堪倫比。願探珊瑚出瑤鉤。

又（與魯卿晚雨泛舟出西郭用煙波定韻）

天末殘霞卷暮紅。波間時見沒鳬翁。斜風細雨家何在。老矣生涯盡個中。惟此意。與公同。未須持酒祝牛宮。旁人不解青裴意。猶說黃金寶帶重。

又

一曲青山映小池。綠荷陰盡雨離披。何人解識秋堪美。莫爲悲秋浪賦詩。攜濁酒。繞東籬。菊殘猶有傲霜枝。一年好景君須記。正是橙黃橘綠時。（梁范堅常謂欣成惜敗者物之情。秋爲萬物成功之時。宋玉作悲秋非是。乃作美秋。賦云。）

水龍吟（西湖燕客作）

對花常欲流春恨。春故遣花飛。早晚來雨過。綠陰新處。幾番芳草。一片飄時。已知消滅。滿庭誰掃。料多情也似。愁人易感。先催趁。朱顏老。猶有清明未過。但狂風匆匆難保。酒醒夢斷。年年此恨。不禁煙草。只恐春口。應留芳信。與花爭好。有姚黃一朵。慙勤付與。送金盃倒。

又

（八月十三日。與張少逸游道場山。放舟中流。命工吹笛。舟尾迎月歸作。）

柁樓橫笛孤吹。暮雲散盡天如水。人間底事。忽驚飛墮。冰壺千里。玉樹風清。漫波搖卷。與空無際。謝嫦娥此夜。慙勤偏照。知人在。千山裏。常恨孤光易轉。仗多情使君料理。□□□□□□□□□□。一盃起舞。曲終須記。但尊前有酒。常追舊事。拚年年醉。

千秋歲（次韻兵曹席孟惠解中千葉黃梅）

曉煙溪畔。曾記東風面。化工更與重裁翦。額黃明豔粉。不共妖紅輕。凝露臉。多情正是當時見。誰向滄波岸。特地移閒館。情一縷。愁千點。煩君搜妙語。爲我催清燕。須細看。紛紛亂蕊空凡豔。

又（小雨達旦。東齋獨宿不能寐。有懷松江舊游。）

雨聲蕭瑟。初到梧桐響。人不寐。秋聲爽。低簷燈暗淡。畫幕風來往。誰共賞。依稀記得船篷上。拍岸浮輕浪。水濶菰蒲長。向別浦。收橫網。綠蓑衝暝色。艇子搖雙漿。君莫忘。此情猶是當時唱。

驀山溪（百花洲席上次韻司錄黃庠）

一年春事。常恨風和雨。趁取未殘時。醉花前。春應相許。山翁倒載。日暮習池回。問東風。春知否。莫道空歸去。滿城歌吹也似春和豫。爭笑使君狂。占風光。不教飛絮。明朝酒醒。滿地落殘紅。唱新詞。追好景。猶有君收聚。

清平樂

水空相映。淡碧涵千頃。素練不收寒玉鏡。影落階無影。纖纖與捧金盃。暗香逐舞徘徊。雪盡玉容開徧。東風不管寒梅。

雨中花慢（寒食前一日小雨。牡丹已將開。與客置酒。座中戲作。）

痛飲狂歌。百計強留。風光無奈春去也。應知相賞。未忍相違。卷地風驚。爭催春暮雨。頓回寒威。

對黃昏蕭瑟。冰膚洗盡。猶覆霞衣。多情斷了。爲花狂惱。故飄萬點霏微。低粉面。妝臺酒散。淚
顆頻揮。可是盈盈有意。祇應真惜分飛。拚令吹盡。明朝酒醒。忍對紅稀。

南鄉子（池亭新成晚步）

淺碧蘸鱗鱗。照眼全無一點塵。百草千花都過了。初新。翠竹高槐不占春。歌嘯墮綸巾。午醉
醒來尙欠伸。待得月明歸去也。青蘋。更有涼風解送人。

又（自後園晚步湖上）

小院雨新晴。初聽黃鸝第一聲。滿地綠陰人不到。盈盈。一點孤花尙有情。卻傍水邊行。葉底
跳魚浪自驚。日暮小舟何處去。斜橫。衝破浪痕久未平。

又（癸卯種梅於西巖。地瘠難立石。間無花。今歲十一月。輒先開數枝。喜而爲賦。）

山畔小池臺。曾記幽人著意栽。亂石參差春至晚。徘徊。素景衝寒卻自開。絕絕照瓊瑰。孤負
芳心巧剪裁。應恐練裙驚綺夜。殘盃。且放疏枝待我來。

卜算子（鳳皇亭納涼）

新月挂林梢。暗水鳴枯沼。時見疏星落畫簷。幾點流螢小。歸意已無多。故作連環繞。欲寄新
聲問採蓮。水濶煙波渺。

又（並澗頃種木芙蓉九月旦盛開）

曉雨洗新妝。豔豔驚衰眼。不趁東風取次開。待得清霜晚。曲港照回流。影亂微波淺。作態低昂好自持。水濶煙波遠。

菩薩蠻（湖光亭晚集○草堂集作重疊金○秋思）

平波不盡蒹葭遠。清霜半落沙痕淺。煙樹晚微茫。孤鴻下夕陽。梅花消息近。試向南枝問。記得水邊春。江南別後人。

蝶戀花

薄雪消時春已半。踏徧蒼苔。手挽花枝看。一縷遊絲牽不斷。多情更覺蜂兒亂。盡日平波回遠岸。倒影浮光。卻記冰初泮。酒力無多吹易散。餘寒向晚風驚幔。

醉蓬萊

（楚州上巳懷許下西湖寄曾在之王仲弓韓文表）

問東風何事。斷送殘紅都拚歸去。牢落征途。笑行人羈旅。一曲陽關。斷雲殘靄。做渭城朝雨。欲寄離愁。綠陰千轉。黃鸝空語。遙想湖邊。浪搖空翠。絃管風高。亂花飛絮。曲水流觴。有山公行處。翠袖朱闌。故人應也。弄畫船。煙浦會寫相思。尊前爲我。重翻新句。

南歌子

（是日微雨。過午而霽。晚遂月出。次劉無言韻）

雨惜山容斂。雲矜棹影開。忽看霽色射林隈。爲問明亭清影。爲誰來。盡洗歸時路。重傾醉後盃。未應霜雪遽相催。留得佳期。猶在共徘徊。

探桑子（冬至日與許幹譽章過道飯館善晚歸雪作因留小飲）

山蹊小路歸來晚。算雪繽紛。尊酒慙慙。邂逅相從只有君。全家住處無人到。元在重雲。此景誰分。萬玉參差更作羣。

石林詞終

石 林 詞

石林詞跋

少蘊自號石林居士。晚年居卞山下。奇石森列。藏書數萬卷。嘯詠自娛。所撰詩文甚富。有建康集。審是集。燕語後人合編石林總集百卷行世。外石林詞一卷。與蘇柳並傳。綽有林下風。不作柔語。殆人真詞家逸品也。其爵里始末具載年譜及本傳。湖南毛晉識。



中國文學珍本叢書

第一輯 第二十一種


中華民國廿五年二月初版

宋六十名家詞乙集

普及本實價四角
特印本實價五角五分

撰著者 毛子晉
校點者 施蟄存
主編者 施蟄存
發行人 張靜廬
總經售 上海雜誌公司

上海總店：四馬路三二四號
廣州支店：永漢北路二三九號
南京支店：太平路二四八號
開封支店：中山北街三八四號
雲南支店：土主廟街四七號



初版本1 — 3000本

